

23 NOV 1999

MAHATHIR-EKONOMI

DR M: EKONOMI M'SIA AKAN LEBIH STABIL DI MASA DEPAN

PUTRAJAYA, 23 Nov (Bernama) -- Perdana Menteri Datuk Seri Dr Mahathir Mohamed berkata ekonomi Malaysia dijangka menjadi lebih stabil di masa depan dan tidak mungkin akan mengalami "kesukaran seperti yang kita alami ketika tempoh 1997 hingga 1998."

Bercakap di persidangan akhbar bersama di sini bersama Perdana Menteri China Zhu Rongji selepas mereka memeterai satu set perjanjian untuk mengeratkan lagi hubungan dua hala, beliau berkata kebanyakan negara di rantau ini telah pulih.

"Kadar pertumbuhan negara berkenaan pada tahun depan pastinya lebih tinggi berbanding pertumbuhan tahun ini," katanya.

Bagaimanapun, Dr Mahathir berkata pertumbuhannya tidak akan mencapai tahap yang sama seperti sebelum krisis.

Beliau menambah negara-negara itu perlu mengambil sedikit masa untuk mencapai peringkat pertumbuhan yang sama yang pernah dinikmati sebelum krisis ekonomi melanda.

"Sebaliknya, kita perlu berhati-hati kerana kuasa yang memaksa ekonomi kita runtuh pada 1997 masih berkeliaran di luar sana dan mereka mungkin akan melancar serangan sekali lagi," tegas memberi amaran.

Dalam hal Malaysia, beliau berkata "kami telah melindungi matawang kami yang tidak lagi tertakluk kepada manipulasi oleh spekulator asing."

Sementara itu, Zhu berkata ketika lawatan Dr Mahathir ke China pada Ogos tahun lalu, Perdana Menteri telah mengusulkan banyak cadangan untuk meningkatkan kerjasama ekonomi dan perdagangan dua hala.

"Hari ini kita telahpun memeterai beberapa dokumen dan lebih banyak lagi masih dalam peringkat perancangan. Di masa depan, saya pasti kami akan meneruskan momentum pembangunan yang menggalakkan ini dalam hubungan perdagangan dan ekonomi serta kerjasama politik dan juga dalam forum antarabangsa," katanya.

Zhu berkata sepanjang krisis kewangan serantau, rakyat Malaysia bersatu padu menggembleng tenaga untuk mengatasi kesukaran mereka.

Dengan memuji Malaysia berikutan pencapaian pemulihan ekonomi yang pesat, beliau menambah, "Saya ingin mengucapkan tahniah kepada rakyat Malaysia di atas kejayaan yang telah dicapai."

Apabila ditanya mengenai Dana Kewangan Asia Timur yang diilhamkan oleh Dr Mahathir, Zhu berkata China menyokong sepenuhnya idea itu.

"Bagaimanapun, pastinya hasil muktamad masih bergantung kepada perbincangan terperinci dan pertukaran pendapat di kalangan pihak-pihak yang berurusan dengan perkara itu," katanya.

Sementara itu, ketika memberi taklimat kepada akhbar kemudiannya, Menteri Luar Datuk Syed Hamid berkata Malaysia meminta lebih banyak hak mendarat di China terutama ke Kunming kerana negara akan membuka sebuah pejabat konsulat di Shanghai serta di Kunming pada awal tahun depan.

Beliau juga berkata China berminat untuk melabur dalam beberapa projek di Malaysia seperti sektor jalan keretapi dan loji kuasa.

China akan menggalakkan industri berteknologi tingginya untuk menyertai dalam Koridor Raya Multimedia (MSC).

"Hubungan perdagangan dengan China berkembang pesat kebanyakannya menerusi negara ketiga, kami mahu lebih banyak perdagangan langsung," katanya.

Malaysia juga meninjau peluang pelaburan di China seperti projek sistem monorel.

Bagi perjanjian perbankan yang akan membuka laluan kepada pembukaan cawangan bank-bank antara kedua-dua negara, Syed Hamid berkata Bank Negara dan People's Bank of China akan membincangkan butir-butir terperinci mengenai perkara itu.

"Tujuannya adalah untuk menggalakkan kerjasama kewangan yang lebih besar antara kedua-dua negara dan butiran terperinci akan diumumkan kelak oleh pihak berkuasa berkaitan.

"Saya rasa ia adalah satu daripada perkara-perkara yang pasti akan berlaku," katanya.

Menurutnya, Malaysia juga akan cuba memudahkan urusan kedatangan pelancong China ke Malaysia, sebagai contohnya dengan memberikan visa bagi tempoh yang lebih lama.

Bagi pihak China pula, beliau berharap negara itu akan lebih fleksibel dalam urusan visa keluar kerana rakyatnya seperti rakyat Malaysia boleh melawat China tanpa perlu sebarang visa keluar.

"China bersetuju dengan semua permintaan untuk menggalakkan pergerakan bebas rakyat kedua-dua negara," katanya.

-- BERNAMA

GM ZK MA